

Suliffissanut, ilitersuisarnernut pikkorissaqqinnernullu qitiusumik ingerlatsiviit pillugit Inatsisartut inatsisaat

Qitiusumik ingerlatsiviit suliassaat

§ 1. Kommunit tamarmik illoqarfinni tamani kommunimiittuni suliffissanut, ilitersuisarnernut pikkorissaqqinnernullu qitiusumik ingerlatsivinnik pilersitsissapput.

§ 2. Suliffissanut, ilitersuisarnernut pikkorissaqqinnernullu qitiusumik ingerlatsiviit suliassaraat:

1) Nuna tamakkerlugu akeqanngitsumik sullississallutik suliffeqarnerup ineriartortinneqarnissaanut, tamatumani aamma nukittorsassallugu sulisut piginnaasatigut ineriartornissaat aamma nunap iluani sumiiffinnut assigiinngitsunut nikilertortarnikkut nuttarsinnaanissaat.

2) Sumiiffinni pineqartuni inuussutissarsiortunik suliffeqarnermi suliniutit pillugit suleqateqassallutik, aamma nunap immikkoortuini nunalu ataatsimut isigalugu. Aamma suliassaraat suliffissarsiortut sulisitsisullu akornanni attavilersuisuunissaq, atorfinitsisoqar-tarnissaanik siunertaqartumik.

3) Suliffissarsiortunut suliffissanik innersuussisassallutik aamma sulisitsisunut inuussutissarsiutini assigiinngiaartuni tamani sulisussanik innersuussisassallutik aamma suliffissanut atorfinnullu assigiinngiaartunut tamanut.

4) Ilinniartitaanernut qinnuteqartunut siunnersuisassallutik qinnuteqartunillu allaffissornikkut aqutsinermik suliaqarlutik.

5) Meeqqat atuarfiat suleqatigalugu klassit annerit siunnersorneqartarnerannik ingerlatsisuussallutik.

6) Suliffissaqarnikkut siunnersuinermik suliffissarsiortunut neqerooruteqartassallutik, inunnullu ataasiakkaanut iliuusissatut pilersaarusiortassallutik, suliffissaaleqisut pineqartut suleqatigalugit, suliffeqalivinnissamik siunertaqartumik.

7) Suliffissaaleqisut pikkorissarneqarnerannut atatillugu inuussutissarsiutinut pikkorissartitsinernik innersuussisassallutik. Suliffissanut, ilitersuisarnernut pikkorissartitsinernullu qitiusumik ingerlatsiviit ilinniagaqalernissamut imaluunniit suliffeqalernissamut piareersaataasunik pikkorissartitsinernik ingerlatsisinnaapput.

8) Innuttaasunik suliffeqanngitsunik tulluarsaqatigiiaanut immikkoortitserisassallutik.

9) Suliffissaaleqisut suliffissarsiussisarnermi nittartakkamut paasissutissanillu nalunaarsuiffinnut allanut naleqquttunut nalunaarsortassallugit.

§ 3. Suliffissanut, ilitersuisarnernut pikkorissaqqinnernullu qitiusumik ingerlatsiviit suliffeerunnermi ikiorsiissutit aamma piginnaangorsaaqqiinissamut tapiissutit aqutaraat, piginnaangorsaaqqittunut

inunnnullu suliffeerunnermi ikiorsiissutini pisartagaqartunut tunniunneqartartut.

Imm. 2. Suliffissanut, ilitersuisarnernut pikkorissaqqinnernullu qitiusumik ingerlatsiviit innuttaasut piginnaanngorsaaqqinnermi peqataasinnaasut suleqatigalugit piginnaanngor-saaqqinnissamut pilersaarummik suliaqartassapput.

Imm. 3. Suliffissanut, ilitersuisarnernut pikkorissaqqinnernullu qitiusumik ingerlatsiviit nikilertortarnikkut nuunnissamut aningaasaliissutini tapiiffigineqarnissamik qinnuteqaatit suliarisassavaat.

Imm. 4. Suliffissanut, ilitersuisarnernut pikkorissaqqinnernullu qitiusumik ingerlatsiviit sulisitsisut sulisussanik avataaneersunik sulisoqarnissamut qinnuteqaataat suliarisassavaat.

Kommunalbestyrelsip suliassai

§ 4. Kommunalbestyrelsip isumagissavaa suliffissanut, ilitersuisarnernut pikkorissaqqinnernullu qitiusumik ingerlatsiviit sullinneqassasut siunnersortini sulianillu ingerlatsisunit pisariaqartunik piginnaanilinnit, takuuk imm. 2, aammalu sullissineq ingerlanneqassasoq naleqquttunik avatangiisilimmik.

Imm. 2. Siunnersuisarnek aamma sulianik ingerlatsineq suliarineqassapput ilinniartitaanernut aamma inuussutissarsiutitut siunnersuinermit ilinniagalinnit, Naalakkersuisunit akuerisaasunit, imaluunniit innunni pineqartut assingini piginnaaneqarnermit uppersaasannaasunit. Kommunalbestyrelsimiit qinnuteqartoqarneratigit Naalakkersuisut akuerisinnaavaat Siunnersuisarnek sulianillu ingerlatsineq utaqqiisaasumik ingerlanneqarsinnaasoq inummit allatigit ilinniagaqartumit, siunnersorti pineqartoq aallartissimappat imaluunniit pilersaaruteqarpat ilinniartitaanernut siunnersortitullu Naalakkersuisunit akuerisaasumik ilinniagaqar-niarlugu.

§ 5. Kommunalbestyrelsip qitiusumik suliffissanut, ilitersuisarnernut pikkorissaqqinnernullu ingerlatsiviit kommunip suliassaanut allanut allaffissorneranullu attuumassuteqanngitsumik aningaasaqarnikkullu kiffaanngissuseqartumik Naalakkersuisunut naammassisassanut isumaqatigiissuteqarneq tunngavigalugu ingerlatarissavai.

Imm. 2. Kommunalbestyrelse suliffissanut, ilitersuisarnernut pikkorissaqqinnernullu qitiusumik ingerlatsiviit ingerlanneqarnerannut ilanngullugu ataatsimiititalianik siunnersuisussanik pilersitsinnaavoq, inuussutissarsiortunit aamma suliffeqarnermi illuatungeriinnit peqataaffigineqartumik.

Imm. 3. Kommunalbestyrelsip isumagissavaa suliffissanut, ilitersuisarnernut pikkorissaqqinnernullu ingerlatsivinnut tamanut suleqatigiinnermut aaqqissuussinermit ataatsimik pilersitsisoqartassasoq, suliffissanut, ilitersuisarnernut pikkorissaqqinnernullu qitiusumik ingerlatsivimmiit, isumaginnittoqarfimmiit kiisalu meeqqat atuarfianniit peqataaffigineqartumik.

§ 6. Kommunalbestyrelsip isumannaassavaa paasissutissat naleqquttut tamarmik suliffissanut, siunnersuisarnernut pikkorissaqqinnernullu qitiusumik ingerlatsiviit suliarnikkut ingerlatsisinnaajumallutik pisariaqartitaat pissarsiarineqarsinnaasasut.

Nakkutilliineq

§ 7. Naalakkersuisut suliffissanut, siunnersuisarnernut pikkorissaqqinnernullu qitiusumik ingerlatsivinnut nakkutilliisuupput.

§ 8. Kommunalbestyrelsip Naalakkersuisunut nalunaarusiortassavai kisitsisit paasissutissat suliffissanut, siunnersuisarnernut pikkorissaqqinnernullu qitiusumik ingerlatsivinnut tunngasut. Kommunalbestyrelsip programmit Naalakkersuisut nalunaarusiortarnernut atugassanngortitaat atortassavai.

Imm. 2. Naalakkersuisut nalunaarusiortarneq pillugu ersarinnerusunik aalajangersagaliorsinnaapput.

Naammassisassanut isumaqatigiissut ingerlatsinermullu aningaasaliissutit

§ 9. Naalakkersuisut kommunalbestyrelsimut naammassisassanut isumaqatigiissuteqassaaq, suliffissanut, siunnersuisarnernut pikkorissaqqinnernullu qitiusumik ingerlatsivinnut atatillugu. Naammassisassanut isumaqatigiissut aalajangersaassaaq suliffissanut, siunnersuisarnernut pikkorissaqqinnernullu qitiusumik ingerlatsivinni ersarinnerusunik anguniagassat pillugit.

Imm. 2. Naalakkersuisut kommunini ataasiakkaani suliffissanut, siunnersuisarnernut pikkorissaqqinnernullu qitiusumik ingerlatsivinnut aningaasaliissutaasunik kiffartuussinermi isumaqatigiissutsikkut annikillisitsinnaapput, kommunalbestyrelsip kiffartuussinermut isumaqatigiissummi piumasaqaataasut naammassinngippagit.

Atuutilerfia

§ 10. Inatsisartut inatsisaat atortuulissaaq ulloq 1. januar 2016.

Imm. 2. Ilutigisaanik atorunnaassapput § 5, imm. 1, imm. 3 aamma imm.5, kiisalu § 12 Suliffeqarnermi innersuussisarneq il.il. pillugit Inatsisartut inatsisaanni nr. 5, 8. juni 2014-imeersumi.

Imm. 3. Malittarisassat Suliffeqarnermi innersuussisarneq il. il. pillugit Inatsisartut inatsisaat nr. 5, 8. juni 2014-imeersumi aalajangersagaasut atuutiinnarallassapput allanik taarserneqarnissami imaluunniit uani inatsimmi aalajagersakkanik tunngavilimmik imaluunniit Inatsisartut inatsisaat alla naapertorlugu atorunnaarsinneqarnissami tungaannut.

Namminersorlutik Oqartussat, ulloq 9. december 2015

Kim Kielsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut